

8. Succession des enfants par leurs parents

1574 janvier 4. Neuchâtel

Si des enfants émancipés décèdent ab intestat, leurs biens reviennent sans autres héritiers à leurs plus proches parents. Ceux qui souhaitent être mis en possession doivent le faire sur le jour des six semaines après l'ensevelissement.

5

Ce point de coutume est cité dans les points SDS NE 3 54, SDS NE 3 178 et SDS NE 3 235.

Declaration sy les peres & meres heritent leurs enfans et s'il est requis se mettre en possession par justice du bien d'un deffunct.

Sur le quatriemes jour de janvier l'an de nostre seigneur 1574^a [04.01.1574], par-devant moy, Antoine Aubert, mayre & du Conseil de la Ville de Neufchastel, au nom et pour la part de tres illustre & puissante princesse Marie de Toutteville, marquise de Rothelin, comtesse dudict Neufchastel etc. et pardevant les sieurs conseillers dudict lieu cy apres nommez est comparu judicialement honnorable homme Anthoine Servant bourgeois d'Estavayer lequel par un parlier par moy à luy octroyé a exposé & fait entendre estre chose veritable que par cy devant il avoit esté marié es coustume du Comté dudict Neufchastel et d'aautant qu'il a besoin de certains poincts des coustumes dudict lieu, demande que declaration luy soit faite sy les effans heus en loyal mariage, estans emancipez et detronquez d'avec pere ou mere soit par partage que mariage divis mouvans ab intestat, le bien par eulx delaissé ne doit revenir et retomber au pere et à la mere dont il est extraict et party, et que par apres lesdictes coustumes ne portent que lesdictes pere ou mere puissent faire et disposer dudict bien à leur bon voulloir et plaisir sans empeschement destourbier ny contredict. En outre demande declaration, assavoir mon que celuy ou ceux qui pretendent jouyr des escheutes & successions advenues ne se doibvent pas mettre en possession et investiture sur le jour des six semaines / [fol. 355r] apres l'ensevelissement du deffunct et en cas que cela ne fust fait; assavoir mon si les pretendans à ladicte succession peuvent estre jouissans de leurs action, priant affectueusement par droict & judiciaire cognoissance desdicts deux poincts avoir declaration pour s'en servir au besoin luy sera apres laquelle propositive ainsi estre faite & ledict mayre en demanday le droict ausdicts sieurs conseillers lesquels apres avoir heu advis & conseil par ensemble, et estre bien souvenans & memoratifs d'un decret fait en l'an mille cinq cents trente deux [1532], tous par une voix concordablement m'ont déclaré & rapporté que, pour ensuivre ledict decret mesme, ce que notoirement le temps passé jusques à maintenant a esté usité, la coutume du Comté dudict Neufchastel a esté et est encore telle que estant, le mary & femme conjointcs au saint estat de mariage esdictes coustumes ayans enfans procéez de leur corps et iceux par apres venoyent à estre emancipez et destronqués d'avecq leursdicts pere ou mere, soit par partage que mariage divis,

la coustume du país porte que s'ils mourroyent sans hoirs procrés de leurs corps et sans faire testament ny donation, le bien par eux delaisé doit monter et revenir au tronc d'où il est party, assavoir le paternel au paternel, et le maternel au maternel comme chose equitable et raisonnable duquel bien lesdicts pere et
5 mere suivant lesdictes coustumes mesmes les libertez & franchises en peuvent et doivent faire à leur bon voulloir et plaisir et le tester et donner à qui bon leur semblera comme francs bourgeois, réservés a moisnes blancs, sans contredict de personne. / [fol. 355v] Et quant au regard des escheutes et successions, la
10 coustume dudict Comté de Neufchastel est telle, que celui ou ceux (sachant la mort du deffunct) qui pretendront avoir action à ladicte succession se doivent approcher sur le jour des six sepmaines apres l'ensevelissement d'icelluy dit deffunct pour se mettre en possession & investiture de leur pretendit. Estre ce fait, doivent pleinement & passiblement jouir dudict bien et action mais estans au lieu & ils ne s'approchent pour se mettre en possession et investiture
15 estan bien certiorés du trespas du deffunct, celui ou ceux ne pourront nullement avoir acces audict bien ains en sont entierement & pour le tout privez & dejetés, et celui ou ceux qui ne seront au lieu, lesdictes coustumes portent qu'ils ont an et jour qu'est ^{b-}un an et ^{-b}six sepmaines pour s'approcher et se mettre en possession et investiture dudict bien delaisé par le deffunct, que alors venant dedans ledict temps, il peut jouyr de son pretendit. Et s'il ne vient durant
20 ledict terme d'an & jour ains qu'il laisse icelluy passer et expirer, il est entierement frustré de ladicte succession et n'en pourra avoir nulle jouissance. Sy donc il n'est rellevé par une audience generale & justice souveraine. Et c'est icy la coustume touchant ledict point que nous les cy apres nommez avons dicte &
25 declarée au plus pres de nos consciences, selon ce qu'en a esté usé et qu'encor de present on fait à tout ce Comté de Neufchastel en ensuivant / [fol. 356r] ce decret sur ce fait & dressé, laquelle declaration de coustume, ledict Anthoine Servant a prié avoir par escript pour s'en servir et ayder au besoin luy ferat, ce que judicialement luy fust adjudgée, et a moy notaire soubscript commandé
30 luy expedier ces presentes en ceste mesme forme soubz le seel de la mayorie dudict Neufchastel cy mis en placquard pour plus grande approbation; c'est par l'adjudication des honorables prudents & sages Jehan Trybollet banderet, Pierre Amiod, Claude Clerc, Jehan Poury, Loys Descostes, Pierre Quelin, Jaques Fequenet, Guillaume Henry dit D'Allemagne, Guillaume Hudry, Jaques Steff, Pierre Jacquemet, Abraham de Vy, le notaire soubsigné, Jehan Barrillier,
35 Jehan Vuillame, George Bosset, Daniel Huguenaud, Loys Ustervald et Jehan Grenot tous conseillers dudict Neufchastel, que ce ont cogneu et sentencé les an & jour que dessus signée par le sieur Jehan Petter.

Coppie prinse & collationnée à son original par moy David Bailliod.

40 °Et par moy notaire, extrait sur ladicte copie, sans mutation.

[Signature :] Carrel [Seing notarial]

Original : AVN B 101.14.001, fol. 354v–356r ; Papier, 23.5 × 33 cm.

- a *Souligné.*
- b *Ajout au-dessus de la ligne.*
- c *Changement de main.*